

Ո Ր Ո Շ ՈՒ Մ

Վարչական գործի վարույթը կարճելու մասին

«17» դեկտեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ պարոն Ա. Մնացականյանս, քննելով վարորդ Բեկա Իվանեիշվիլիի վերաբերյալ նյութերը.

Պ Ա Ր Զ Ե Ց Ի՝

2021 թվականի դեկտեմբերի 14-ին ՀՀ ՊԵԿ Արևելյան մաքսատուն-վարչության աշխատակիցները Բագրատաշենի մաքսային-կետ բաժնի մաքսային հսկողության տարածքում զննման են ենթարկել վարորդ Բեկա Իվանեիշվիլիի կողմից վարվող «DAF» մակնիշի, «G077LDIMM5900N» պետհամարանիշի ավտոմեքենան:

Զննման արդյունքում պարզվել է, որ ՌԴ Վերին Լարս անցակետում «Ալֆա պրոգրես» ՍՊ ընկերության անվամբ 10.12.2021թ. թիվ 10803040/101221/0143244 տարանցման հայտարարագրում հայտարարագրված բուսական գորգի փաստացի ՀՀ տեղափոխված հատաքանակները համապատասխանել են կից փաստաթղթերում և տարանցման հայտարարագրում նշված հատաքանակներին, սակայն առկա է եղել քաշերի անհամապատասխանություն:

Համաձայն 14.12.2021 թվականի թիվ 05100033/131221/0045969 մաքսային զննման ակտի՝ մաքսային մարմինների կողմից դրված մաքսային ապահովման միջոցները վնասված չեն եղել:

Վարորդ Բեկա Իվանեիշվիլիի նկատմամբ 2021 թվականի դեկտեմբերի 14-ին ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

«Ալֆա պրոգրես» ՍՊ ընկերության տնօրենը հայտնել է, որ ապրանքը ձեռք է բերվել հատաքանակով, այլ ոչ թե քաշով և որևէ առնչություն չունեն քաշի անհամապատասխանության հետ: Միաժամանակ հայտնել է, որ քաշի տարբերությունը կարող է լինել ջերմաստիճանի տատանման, խոնավության պատճառով, ինչպես նաև փաթեթավորման հումքից և այլ հանգամանքներից:

ՀՀ ՎԻՎ օրենսգրքի 247-րդ հոդվածի 1-ին մասի 1-ին կետի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝ վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է, արդյոք, վարչական իրավախախտում, արդյոք, տվյալ անձը մեղավոր է այն կատարելու մեջ, արդյոք, նա ենթակա է վարչական պատասխանատվության:

Վերոշարադրյալ նորմերի համադրված վերլուծությունից ակնհայտ է, որ օրենսդիրը, Վարչական իրավախախտումների վերաբերյալ ՀՀ օրենսգրքի ընդհանուր մասում սահմանելով վարչական իրավախախտման, այն կատարելու համար նախատեսված վարչական պատասխանատվության, վարչական տույժի և դրա նպատակների հասկացությունները, ինչպես նաև տույժ նշանակելու ընդհանուր կանոնները, որպես վարչական պատասխանատվության ընդհանուր սկզբունքներ ամրագրել է անձնական պատասխանատվության և «պատասխանատվությունը մեղքի համար» սկզբունքները: Նշված սկզբունքների էության շուրջ

որ դիրքորոշումն է հայտնել նաև ՀՀ Սահմանադրական դատարանն իր 2014 թվականի հունիսի 3-ի թիվ ՍԴՈ-1153 որոշման մեջ հետևյալ հիմնավորումներով. «Վարչական իրավախախտումների վերաբերյալ ՀՀ օրենսգրքի 9, 32 և 279 հոդվածների համադրված ուսումնասիրությունը վկայում է, որ վարչական պատասխանատվության սկզբունքներից է «պատասխանատվությունը մեղքի համար» սկզբունքը, ինչը նշանակում է, որ վարչական տույժը (պատասխանատվությունը) կարող է կիրառվել միայն վարչական իրավախախտում կատարելու մեջ մեղավոր անձի նկատմամբ:

Հետևաբար՝ մեղքը, որպես վարչական զանցակազմի սուբյեկտիվ կողմի պարտադիր տարր, հանդիսանում է վարչական պատասխանատվության իրավական միակ նախապայմանն ու նախադրյալը: Նշված սկզբունքը սերտորեն առնչվում է նաև վարչական պատասխանատվության մեկ այլ սկզբունքի՝ անձնական պատասխանատվության սկզբունքին, որի համաձայն անձը ենթակա է պատասխանատվության միայն անձամբ կատարած իրավախախտման համար...»:

Բեկա Իվանեիշվիլին 2021 թվականի դեկտեմբերի 17-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել:

Այսպիսով, նյութերով պարզվել է, որ «Ալֆա պրոգրես» ՍՊ ընկերության անվամբ 10.12.2021թ. թիվ 10803040/101221/0143244 տարանցման հայտարարագրով հայտարարագրված և ՀՀ ներմուծված բուսական գորգի բեռն ուղեկցող և տարանցման հայտարարագրում նշված հատաքանակը փաստացի համապատասխանում է ՀՀ տեղափոխված ապրանքի հատաքանակին, իսկ քաշի տարբերություն առկա է ոչ Բ. Իվանեիշվիլիի մեղքով՝ հիմք ընդունելով 07.12.2021թ. թիվ 0712-01 հաշիվ-ապրանքագիրը և 07.12.2021 թվականի թիվ 0712-01M բեռնագիրը, այսինքն՝ վերջինիս արարքում բացակայում է ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ նախատեսված մաքսային կանոնների խախտման կազմը:

Վերոգրյալի հիման վրա և ղեկավարվելով, ՎԻՎ ՀՀ օրենսգրքի 247-րդ հոդվածի 1-ին մասով, ՀՀ մաքսային օրենսգրքի 206-րդ հոդվածով և 221-րդ հոդվածի 1-ին մասի բ) կետով,

Ո Ր Ո Շ Ե Ց Ի՝

1. Բեկա Իվանեիշվիլի (անձնագրի համար՝ 20AB15552) նկատմամբ սկսված վարչական գործի վարույթը կարճել՝ իրավախախտման կազմի բացակայության պատճառաբանությամբ:
2. Որոշման մասին հայտնել Բ. Իվանեիշվիլին՝ պարզաբանելով, որ ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՅԱԿԱՆՅԱՆ